

Tun M hargai sokongan berterusan Jepun ke atas Malaysia
Astro Awani
31 Mei 2019
Firdaus Azil,

TOKYO: Perdana Menteri, Tun Dr Mahathir Mohamad menzahirkan penghargaan tertinggi kepada kerajaan Jepun yang dipimpin Abe Shinzo atas komitmen berterusan dalam membantu Malaysia mencapai status negara maju.

Dalam satu pertemuan rasmi dengan rakan sejawatannya itu, Dr Mahathir berkata, beliau sangat gembira dengan kerjasama erat yang dicapai secara berterusan antara kedua-dua negara baik dari segi hubungan antara kerajaan, serta hubungan antara sektor korporat.

“Saya sangat gembira apabila komuniti perniagaan di Jepun telah menzahirkan komitmen mereka untuk terus menyokong industri di Malaysia, serta janji mereka untuk membawa lebih banyak pelaburan ke negara kami,” katanya sewaktu memberi ucapan pembukaan dalam pertemuan itu.

Terdahulu, Dr Mahathir tiba di pejabat Perdana Menteri Jepun diiringi Timbalan Menteri Luar, Datuk Marzuki Yahya, Duta Malaysia ke Jepun, Datuk Kennedy Jawan serta pegawai tinggi kerajaan Malaysia yang lain.

Shinzo pula diiringi beberapa penasihat kanan beliau antaranya Eiichi Hasegawa, Kentaro Sonoura, Hiroto Izumi dan Duta Jepun ke Malaysia, Dr Makio Miyagawa serta pegawai kanan lain.

Menurut Shinzo, Jepun sangat memandang tinggi kepimpinan Dr Mahathir, terutamanya usaha beliau dalam mengembalikan Malaysia ke negara yang memegang prinsip patuh

pada undang-undang, pentadbiran yang berintegriti dan telus serta komitmen dalam mengurangkan hutang negara.

“Jepun akan terus memberi sokongan dan bantuan kepada Malaysia,” kata Shinzo semasa berucapa dalam pertemuan itu.

Selain itu, Perdana Menteri Jepun itu berkata, Dasar Pandang Ke Timur yang diperkenalkan Dr Mahathir sewaktu era pertama menjadi Perdana Menteri Malaysia ke-4 serta Dasar Pandang Ke Timur 2.0 yang diperkenalkan sewaktu kembali menjadi Perdana Menteri telah mengeratkan lagi hubungan antara dua negara itu.

“Dengan versi 2.0 ini, Jepun mengharapkan agar kedua-dua negara dapat mengembangkan lagi hubungan ke tahap yang jauh lebih baik,” katanya.

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/tun-m-hargai-sokongan-berterusan-jepun-ke-atas-malaysia-209063>